

# DISKURSU BA SESAUN PLENÁRIA KONA-BA MEDIDA EKONÓMIKA SIRA

## MPKM Reprezenta Primeiru-Ministru

(Hanesan apresenta iha sesaun)

Loron 20 fulan-outubru

### INTRODUSAUN

Iha tinan 2020 nia laran, ita-nia nasaun hasoru dezafiu istóriu no sein presedente sira. Ita tama ba tinan ne'e ho restrisaun orsamentál ne'ebé forte tebetebes. Tuir previzaun, ida-ne'e sei lori ita ba períodu kreximentu ekonómiku negativu seluk ida. Ita hasoru dezastre natural no impasse polítiku ida-ne'ebé la'ós baibain. Iha fulan fevereiru, COVID-19 deklaradu hanesan pandemia globál. Iha fulan-marsu, mosu kazu dahuluk iha ita-nia nasaun.

Bainhira haree ba situaun ida-ne'e, ita tenke hateke ba kotuk. Ita tenke reziste hasoru tendénsia retrospectiva, atu avalia saida maka akontese ona husi fulan-marsu to'o fulan-maiu ho saida maka ita hatene agora, ho informasaun ne'ebé ita hetan hafoin faktu ne'e. Hanesan ita dehan, Timor-Leste nu'udar nasaun ida mós husi nasaun 23 de'it, iha ne'ebé laiha ema ida maka mate tanba COVID. Husi nasaun 23 ne'e, ita maka nasaun boot liu daruak, kona-ba número populaun. Iha momentu ne'ebé ita dezenvolve resposta, ita-nia polítiku na'in sira tau sees tiha sira-nia diferenza sira. Ita-nia sidadaun sira halo tuir regra sira. Sira fase liman, uza máskara no mantein distáncia sosiál. Hanesan ita dehan, ita-nia sidadaun sira, maizumenus, fila daudaun ona ba vida normal. Atu koloka konkista ida-ne'e iha perspetiva, ita haree nasaun sira seluk, riku ka kiak, ne'ebé sofre tanba pandemia ida-ne'e, ho número ema mate nian ne'ebé sa'e ba beibeik, *lock down* fila-fila o luta polítika interna. Senáriu ida-ne'e maka, tuir ema barak nia haree, bele akontese iha ita-nia rain. Tanba ne'e maka parseiru dezenvolvimentu nian no embaixada balun evakua sira-nia sidadaun no sira-nia funsionáriu sira. Bainhira hateke filafali ba kotuk, ita tenke hanoin mós kona-ba projesaun ekonómika sira iha momentu ne'ebá, ko'alia kona-ba depresaun ekonómika no kolapsu ekonómiku.

Mai ita hanoin filafali saida maka akontese iha fulan-abril ne'e. Karik iha fulan-abril ita bele haree agora daudaun ita iha ne'ebé, ema mate laiha, ho ita nia moris loron-loron nian fila fali ba normál iha fulan-maiu ka fulan-juñu, ita bele konsidera ida-ne'e hanesan susesu boot ida?

Permite ha'u fó detallu balun ba ita-boot sira kona-ba impaktu negativu sira ne'ebé bele mosu iha momentu ne'ebá no kompara impaktu negativu hirak ne'e ho buat ne'ebé akontese duni. Iha momentu pandemia ne'e mosu fofoun, comunidade internasionál (Índise Risku Global INFORM) prevee ona katak Timor-Leste bele iha tan problema sira kona-ba saúde no ekonomia, no sira-nia número indika ona nivel risku daruak ne'ebé boot liu ba Timor-Leste, iha rejiaun ne'e tomak. Iha momentu ne'ebá, diskusaun internasionál sira mós sujere katak medida sira-ne'ebé Estadu foti bele lori kustu (umanu sira) boot liu fali moras ne'e rasik – liuliu iha nasaun sira iha faze dezenvolvimentu nian hanesan Timor-Leste. Iha nivel inserteza nian ne'ebé boot tebetebes iha fulan-marsu no fulan-abril, kona-ba xoke saúde nian, ne'ebé


rezulta iha eventua katastrófiku sira, ho estimativa kona-ba ema mate maka 390 no 11.700. Senáriu ne'ebé aat liu prevee katak mate bele to'o 12.000. Aleinde ne'e, rezultadu negativu sira ne'ebé bele mosu ba ekonomia iha tinan 2020, iha ne'ebé senáriu previzaun nian ida-ne'ebé pesimista hatudu katak Timor-Leste sei monu maka'as iha kreximentu PIB nian, ho -9,3 porsentu (Banku Mundiál, fulan-Abríl tinan 2020) ba tinan ne'e nia rohan.

Faktu husi kestaun ohin loron nian maka katak ita salva ona ema nia vida – ida-ne'e de'it maka konkista polítika nian ida ne'ebé substansiál liu, tanba ita koloka ema iha sentru no ita asegura katak meu subsisténcia ema hotu nian hetan protesau. Iha tempu hanesan, ita fó atensaun ba protesau moris ema-nian, ita mós hasoru impaktu ekonómiku, no prioritiza medida sira hodi fó protesau ba direitu ekonómiku no sosiál.

Projesaun internasionál sira ikus ne'e prevee agora daudaun katak ekonomia Timor-Leste nian sei sofre kontrasaun besik 6,8 porsentu iha tinan 2020, revizaun ida-ne'ebé iha deklíniu significativu boot hamutuk porsentu 9,3. Bele-bele, ida-ne'e akontese tanba medida estabilizasaun ne'ebé hamenus impaktu sira ne'ebé grave liu husi COVID-19. Revizaun ba previzaun sujere katak ba daudaun ne'e ita hakat liu ona senáriu aat liu, maibé laiha buat ida mak iha serteza bainhira pandemia ne'e seidak menus iha mundu tomak.

Maibé, eziste observasaun fundamentál sira ba projesaun sira-ne'e. Ida, sei iha inserteza barak kona-ba COVID-19. Maske nune'e, ita atentu nafatin no medida rekupersaun sira ne'ebé governu implementa sei ajuda halo impaktu ba empreza sira no moris ema nian kmaan liután. Daruak, aprovasaun husi Orsamentu Jerál Estada tinan 2020 sei loka no hasa'e gastu públiku, ne'ebé sei apoia maka'as medida ekonómika no medida sira-ne'ebé relasiona ho saúde, no oportunidade ba ekonomia ida-ne'ebé iha kreximentu no próspera. Datoluk, ita la'o daudaun ba aumentu PIB nian iha trimestre datoluk tinan 2020 nian, bainhira atividade sira-ne'e la'o normal fila fali ho lalais liu duke ida-ne'ebé ita espera.

Ita sei avansa neineik iha direasaun ba trajetória atividade ekonómika ne'ebé projeta ba pré-pandemia ba



períodu 2020-2025 (haree figura), ne'ebé sujere katak iha possibilidade efeitu pandemia ne'e nian ba atividade ekonómika sei dura liu fali medida rekupersaun nian ne'ebé foti governu, no PIB sei rekupera neineik. Mézmuke hafoin risku sira ba saúde bele hamenus, ekonomia sei demora uitoan atu fila fali ba nivel anteriór virus PIB nian, maske bele to'o iha ne'ebá. Projesaun internasionál sira prevee katak taxa kreximentu ne'ebé projeta Timor-

Leste sei sa'e ba 3.1% (Banku Mundiál), 3,3% (Banku Aziátiku ba Dezenvolvimentu) ka 4% (FMI) iha tinan 2021, ne'ebé natoon atu rekupera nivel atividade sira husi tinan 2019 (3,9%). Rekupersaun ne'ebé projeta ba tinan 2021 forte liu duke nivel sira iha tinan 2018 (-0,8%), 2017 (-3,8%), 2016 (3,4%) no 2015 (3,1%). Importante tebes atu nota katak merkadu emerjente sira no ekonomia sira iha faze dezenvolvimentu nian sei bele sofre kontrasaun iha tinan ne'e, liuliu Tailândia -8%, Filipinas -7,3%, Singapura 6,2% no Malázia -5%, no sira ne'e bele iha dezempeñu di'ak liu iha mundu. Rezultadu sira-ne'e

iha parte mundu nian sira seluk, bele aat liu fali. Revizaun ba leten husi previzaun kreximentu ne'ebé aas ba Timor-Leste hatudu katak governu la'ó hela iha diresaun loos.

Maske agora daudaun la eziste ona kazu COVID-19 nian iha Timor-Leste, maybe família sira sei hamenus sira-nia konsumu no mós espera katak empreza sira sei kuidadu didi'ak nafatin no sira sei bele atraza tan desizaun investimentu nian sira. Ho padraun rekuperasaun nian, ne'ebé ekonomista sira bolu rekuperasaun sira ho "forma U" ka "ho forma *swoosh*", sei hein katak ekonomia sei hatán neineik liu, mézmuke bainhira governu hahú suspende restrisaun sira. Maibé, resesaun foin hatudu ladún grave duke ne'ebé ida-ne'ebé prevee katak bele, tanba normalizasaun ekonómika no ita-nia medida fiskál sira hasa'e kreximentu ekonómiku.

Relatu ne'e fó mai ita instantáneu estensaun ida kona-ba dezlokamentu ekonómiku bainhira COVID-19 atinje Timor-Leste, maske resesaun ne'ebé koronavírus lori mai bele kmaan no ninia moris parese badak, iha ne'ebé atividade monu iha trimestre 2, maibé ita hein katak rekuperasaun bele hahú iha fulan-agostu no setembru, bainhira ekonomia loke filafali ona.

Atu tau iha kontestu, importante atu destaka katak, sein medida sira ka resposta ruma ne'ebé tarde no moderadu husi governu, ema ne'ebé mate no ema moras tanba COVID-19 bele afeta maka'as liu família, sociedade no ekonomia, no iha tempu hanesan bele aumenta nivel pobreza no desigualdade nian. Ita konsege kontrola "tempestade perfeita ida" (laiha orsamentu jerál estadu, dezastre natural no COVID-19 mosu) no xoke ekonómiku ne'ebé maka'as liu iha ita-nia istória dezde ukun rasik-an tanba asaun polítika ne'ebé brani no, importante liu, konsensu polítiku ida-ne'ebé forte.

## RESPOSTA BA COVID-19

Iha períodu tempu nian ne'ebé badak tebes, Governu gasta ona osan hamutuk US \$ millaun 91,7 hodi implementa medida resposta ekonómika nian hamutuk 19. Iha semana hirak hafoin estadu emerjénsia, sentru krize emerjénsia nian ida harii; mekanizmu ida hodi finansia ba resposta kria ona; medida sira ne'ebé maka projeta, tau iha debate ativamente no hetan akordu. Lejizlasaun subsidiária implementa ona ho lalais tebes. Iha momentu ne'ebá, nasaun hala'ó ho prinsípiu responde di'ak no halo ho responsabilidade, la'ós responde ho perfektu. Perfeisaun iha ambiente hanesan ne'e la'ós no la posivel. Partidu polítiku hotu-hotu, inklui opozisaun, ho firme koloka nasaun iha partidu nia leten. Timoroan, husi kamada sociedade oin-oin, hamutuk ida de'it.

Liutiha loron balu hafoin kriaun estadu emerjénsia, subsidiu eletrisidade nian implementa no bee moos fornese ho gratuita. Iha tempu ne'e, ita-nia depózi ai-han mamuk hela. Maske abastesimentu sofre kolapsu makaas iha mundu tomak, ita servisu susesu ho setór privadu hodi evita perturbasaun ba kanál abastesimentu nian iha Timor Leste, mantein kondisaun merkadu nian ba presu hahán báziku sira, hodi hatán ba nesesidade seguransa alimentár husi ita-nia populasaun. Maske ta'uk, presu ba ai-han sira nafatin estavel. No depois, ita konsege importa foos tonelada 30.000 husi Vietnam hanesan medida kontinjénsia hodi reforsa ita-nia rezerva nasionál ai-han nian. Projesaun Governu nian kona-ba rezerva nasionál, adequada, bazeia ba situasaun oferta no prokura. Durante períodu ne'e, ita mantein konektividade internasionál liuhusi Darwin. Aviaun kontinua tula ekipa médika no sasán médiku importante sira. Esénsia husi ita-nia resposta maka apoiu osan ba uma-kain sira. Lojístika ba ida-ne'e kompleksa tebes. Intervensaun projeta husi zero. Ita rejista uma-kain sira iha suku hotu-hotu; ita dezenvolve prosedimentu operasionál; ita mobiliza seguransa no transporte; no fundu sira transfere ba

BNCTL nian Sukursál Munispál hotu-hotu. Iha fulan rua nia laran, kada família hahú simu ninia apoiu finanseiru. Atu garante produsaun ai-han, Ministériu Agrikultura no Peskas distribui dolar millaun ba fatór produsaun agríkola. Alunu sira iha rai-li'ur ne'ebé hela de'it iha uma ita rejista no fó apoiu finanseiru, ezersísiu seluk ne'ebé presiza inisiativa lojístika ne'ebé boot tebes.

Klaru katak medida balun dezafiadora duni. Ita atraza atu estabelese programa sira kona-ba apoiu ba kréditu liuhusi ita-nia sistema bankáriu, no subsídiu salariál hatudu duni katak susar atu implementa.

Klaru katak ita-nia resposta la perfeita. Maibé, karik ita haree liu de'it, ita hahú husi zero, husi surat-tahan mutin ida, iha situasaun ida-ne'ebé pratikamente la iha rekursu finanseiru, ba debate saudavel ida no akordu amplu ida kona-ba saida maka atu halo, ba mobilizasaun fundu, no ba implementasaun husi medida apoiu ekonómiku nian lubuk ida, iha tempu pandemia no ta'uk nian, ne'ebé implementa hotu liuhusi Ministériu, ajénsia no estrutura emerjénsia nian oin-oin.

Ita la'o liu ona dalan ne'ebé naruk hodi aprende katak, aleinde ita bele prevene ema mate, intervensaun governu iha saúde públika no iha ekonomia bele halo output ekonomia no kustu konsumu COVID-19 nian la'o ho di'ak. Karik haree didi'ak ita parese hetan ona susesu "hatetuk kurva resesaun nian". Parese ita-nia pakote medida ekonomia nian hamutuk 19 ajuda ona hodi apoia família no empreza sira, katak ita evita parsialmente resesaun masiva ida ne'ebé sei remata tinan ne'e ho diminuisaun iha PIB porsentu -9,3.

Iha fulan-agostu tinan 2020, Fundu COVID-19 nian atribui ona orsamentu hamutuk US millaun 91.716.636, iha ne'ebé US \$ millaun 88.274.151 maka gasta ona ba estímulo ekonómiku (88,3%).

Maske iha dezafiu oin-oin, Timor-Leste hetan ona susesu ne'ebé di'ak tebes iha área saúde no ekonomia. Timor-Leste sei konsideradu hanesan istória susesu internasionál nian ida kona-ba oinsá ita-nia nasaun responde ona ba krize ekonomia no saúde. Oras ne'e, bele dehan, iha Timor-Leste moris la'o normal filafali ona. Ida-ne'e la akontese iha Europa. La akontese iha Amérika Norte. La akontese iha Amérika Sul. No Infelizmente, ida-ne'e la akontese iha Ázia Sul no parte oin-oin Ázia nian.

Haree apéndice ba Ezekusaun Orsamentu.

## REKUPERASAUN

Planu rekuperasaun ekonómika ida aprovalu tiha ona, ho foku ba agrikultura, turizmu, abitasaun, edukasaun, saúde, protesasaun sosiál no reforma institusionál. Planu ne'e kombina medida ba prazu badak no prazu médiu hamutuk 17 ne'ebé Governu Konstitusionál VIII sei implementa to'o tinan 2023.

Planu ne'e fahe ba etapa rua: etapa dahuluk ninia objetivu maka atu hamenus impaktu COVID-19 nian liuhusi reposta prazu badak (liuliu iha semestre daruak tinan 2020 nian), no etapa daruak ida ho medida sira médiu prazu nian ba rekuperasaun ekonómika (ne'ebé kobre períodu tinan 2 to'o tinan 3). Faze dahuluk atu evita lakon empregu, apoia família sira no prevene taka empreza sira – ho objetivu atu mantein nivel konsumu no padraun moris nian. Medida sira ba prazu badak inklui fahe bote neseseidade bázika nian (ka voucher) ho valor \$25 ba kda ema (uza rejistu Uma-Kain), subsídiu rekuperasaun fulan haat ba empreza sira ne'ebé rejista lakon rendimentu, no izensaun kontribuisaun sira ba seguransa sosiál.

Faze daruak ne'e atu hatan ba dezafiu sira ne'ebé kauza husi pandemia, no mós ba problema estrutural sira. Faze ne'e kobre área sira hanesan:

- **Agrikultura** (no agroindustria ki'ik). Foku ba Kafé (liuhusi subsidiu ida hodi apoia renovasaun plantasaun sira) aleinde ai-kameli no ai-teka. Ba oin, Governu prevee implementasaun politika substituisaun (parsial) ida ba importaun, liuliu husi foos.
- **Turizmu**. Ninia objetivu mak atu kria empreza estadu ida hodi impulsiona setor ne'e, hadi'a edukasaun no formasaun profesional, rehabilita infraestrutura (hanesan rezidensia administrador nian tuan sira no estrada rural sira), no promove ekoturizmu (ho kombina fatin alojamentu nian ho kafé laran ka natar)
- **Abitasaun**. Planu ne'e ninia objetivu maka atu implementa programa abitasaun sosial nian ida ne'ebé Institutu Nasionál Seguransa Sosial ka instituisaun foun ida maka sei jere, nune'e bele alkansa universalizasaun saneamentu baziku, bee no enerjia elétrika iha nasaun laran tomak.
- **Edukasaun**. Ninia objetivu mak atu aumenta proporsaan orsamentu Estadu ne'ebé alokadu ba setor ne'e, aumenta número eskola CAFE sira – nune'e mós rede eskola sekundária, pré-eskolár no sentru formasaun profesional – no promove manutensaun no rekupersaan edifisiu eskola nian sira.
- **Saúde**. Ninia objetivu maka aumenta gastu rekorrente sira hodi hadi'a qualidade servisu saúde nian, fortalese apoio finanseiru no tékniku sira ba programa prinsipal sira (hanesan saúde iha família, saúde skolár no saúde iha serbisu) investe iha infraestrutura, no hadi'a formasaun ba pesoal saúde nian.
- **Protesaan Sosial**. Ninia objetivu mak atu kria mekanizmu pagamentu alternativu (atu evita selu osan direta no hamenus kustu) aumenta kobertura 'Bolsa da Mãe; aumenta protesaan (ezemplu, mate iha rejime la'ós kontributivu) implementa programa empregu ativu nian no avalia viabilidade husi rendimentu baziku universal ida.
- **Aspetu institusionál**. Ninia intensaun ne'e maka aprova lejizlasaun hotu-hotu ne'ebé pertinente ba kestaun fundiária sira, elabora no aprova lejizlasaun emperezial (hanesan rejime falénsia) hadi'a funsionamentu tribunál sira no reforma administrasaun pública.
- **Instalasaun fibra ótika**. Ninia objetivu maka implementasaun fibra ótika iha nasun laran tomak, liuhusi fiu iha tasi okos ne'ebé liga Timor-Leste ba mundu tomak.
- **Fonte enerjia renovavel, sustentavel no alternativa**. Planu ne'e atu halo promosaun fonte enerjia renovavel sira – liuliu loromatan, bee no anin.

## SEKSAUN FINÁL: PRAZU NARUK

Pandemia ne'e oferese oportunidade ida ne'ebé importante atu ita aprende. Forsa husi ita-nia povu no ita-nia unidade nasional ita bele haree momoos. Maibé ida-ne'e akontese mós ho dezafiu ne'ebé ita nafatin enfrenta. Ita-nia prioridade politika sei habelar objetivu ekonómiku ne'ebé amplu husi Programa Governu Konstitusionál Dauluk nian, atubele harii dalan kreximentu sustentavel nian ne'ebé forte liu no dezvoltimentu ekuitativu.

Dahuluk, ita-nia politika makroekonómika sei apoia liu dezvoltimentu husi setor produtivu sira (agrikultura, turizmu, petróleu, mineral no manufatura), promosaun setor privadu no fortalese ita-nia sustentabilidade fiskal no industria finanseira, tuir seksaun 5.1 husi ita-nia programa Governu nian. Ida ne'e mós signifika katak ita sei revitaliza oinsá politika makroekonómika apoia dezvoltimentu infraestrutura nian, serbisu ba foin-sa'e no konstrui rekursus umanus no kapasidade ita-nia instituisaun pública sira nian.

Daruak, sei reforsa no implementa politika sira hodi garante implementasaun husi asaun no estratéjia sira ba kreximentu sustentavel no dezvoltimentu ekuitativu iha nasaun hotu. Ida-ne'e envolve prioridade imperativa sira hanesan tuirmai, ne'ebé iha relasaun ho Programa Governu nian:

- **Dezenvolvimentu agronegósiu, peska no turizmu** hanesan setór hirak ne'ebé potenciál tebes atu apoia transformasaun ekonómika país nian iha prazu badak no prazu médiu liuhusi investimentu ba agregasaun ho valór no kualidade di'ak ne'ebé haree ba merkadu importasaun nian. Ida-ne'e hanesan baze fundamentál ida ba dezenvolvimentu ekonómiku no sosiál país nian. Iha oportunidade importante atu aproveita iha tranzisaun husi produsaun subsisténsia nian ba produsaun emperezariál produktu agríkola, pekuária, peska nian (seksaun 4 husi Programa Governu nian).
- **Teknolojia sempre sai hanesan motór prinsipál ba dezenvolvimentu.** Tanba ne'e, aproveitamentu ba teknolojia hanesan promesa boot ida ba setór-xave sira iha dezenvolvimentu prazu naruk Timor Leste nian, ne'ebé inklui turizmu no komérsiu, hanesan mós ba modernizasaun Estadu no hadi'a prestasaun servisu husi instituisaun públika sira.
- **Forsa traballu ida ne'ebé kualifikada maka kondisaun nesésaria ba dezenvolvimentu ekonómika sustentavel,** ne'e impulsiona atualizasaun kualidade husi produktu no kreximentu husi produtividade, estimula empriendedorizmu no seluk-seluk tan. Tanba ne'e, ita sei kontinua hadi'a kualidade husi ensinu no formasaun profisionál, hodi garante asesu ne'ebé hanesan ba populusaun timoroan hotu iha área ensinu nian (seksaun 2.1 husi Programa Governu nian).
- **Ita sei revitaliza promosaun ba indústriá hanesan forsa ne'ebé dudu dezenvolvimentu ekonómiku nasionál** (seksaun 4.5 husi Programa Governu nian). Parké Industriál Timor Leste nian ne'ebé planeadu ninia objetivu mak atu atende setór lojístika no armazenamentu tanba ninia pozisaun únika iha korredór ekonómiku prinsipál sira. Ita sei fó apoiu ba setór komplementár sira tuir sira-nia kapasidade atu atende ba objetivu sira husi parké industriál ne'e, hanesan agregasaun valór no diversifikasaun ekonómika, ne'ebé iha ninia parte tenke aliñada ho estratéjia ekonómika no indústriá ne'ebé ampla liu.

## KONKLUZAUN

Maske dezafiu hotu ne'ebé mosu tanba krize oioin, laiha ema ida maka mate iha Timor-Leste kauza husi COVID-19 tanba intervensaun husi governu kontinua proteje nesetidade bázika ba sidadaun no família sira hotu, tanba ida ne'e maka baze husi ita-nia ekonomia ba aban-bain rua nian.

## Apêndice

KÓDIGU	ÁREA POLÍTICA/ESTRATÉJIA	A: ORSAMENTU ORIJINÁL	B: ORSAMENTU NE'EBÉ REVEE ONA	C: TOTÁL GASTU	D: SALDU/ (B-C)	EZEKUTA ONA (C+B)
<b>1</b>	<b>Konetividade Transporte nian</b>					
5080601	1.1 Subsídium ba vuu semanal 3 Díli-Darwin (MTCI)	\$585,009	\$1,813,609	\$1,514,836	\$298,773	83.53%
	1.2 Subsídium transporte marítima merkadoria nian (viajen 2/fulan:MTCI)	\$90,000	\$0	\$0	\$0	0%
<b>2</b>	<b>Distribuisaun beins nesesidade bázika sira</b>					
5890103	2.1 Garante abastesimentu foos iha situasaun emerjénsia ho sufisiente no halo distribuisaun ho seguru besik MT 19.000 (CNL)	\$18,216,815	\$16,962,500	\$16,500,000	\$462,500	97.27%
	2.2 Apoiu transporte karga durante oras 24 nia laran husi Portu ba armazén (MTCI)	\$180,000	\$0	\$0	\$0	0%
5740501	2.3 Garante produsaun liuhusi akizisaun maihusi agrikultura no peska (fertilizante, semente, nsst.) (MAFF)	\$4,952,522	\$4,952,522	\$2,198,290	\$2,754,232	44.39%
<b>3</b>	<b>Tele-Komunikasaun</b>					
	3.1 Sosa pakote SMS hodi oferese apoiu ba kréditu eletrisidade nian, transferénsia osan no komunikasaun sira seluk	\$0	\$0	\$0	\$0	0%
	3.2 Fornese konektividade ba internet subsidiadu ba estudante ensinu superiór no profesór na'in 67,500 no estudante ensinu sekundáriu na'in 165,000 (MTCI)	\$600,000	\$0	\$0	\$0	0%
	3.3 Implementa sistema alerta ida hodi buka tuir kazu COVID-19 (MTCI)	\$260,000	\$0	\$0	\$0	0%
<b>4</b>	<b>Neseidade</b>				\$0	
	4.1 Fornese eletrisidade gratuita kada fulan ho valór \$15 ba família besik 160,555 kada kontadór (MOP)	\$7,686,675	\$0	\$0	\$0	0%
	4.2 Fornese bee gratuita ba uma-kain hotu (MOP)	\$262,680	\$0	\$0	\$0	0%
<b>5</b>	<b>Kréditu (BNCTL)</b>					
	5.1 Implementa programa reeskalonamento (halo fali oráriu) ba pesoál empréstimu no emprefáriu iha setor bankáriu hotu	\$8,182,500	\$0	\$0	\$0	0%
	5.2 Implementa Fasilidade Kréditu Emerjénsia nian ida	\$3,000,000	\$0	\$0	\$0	0%
	5.3 Implementa mekanizmu garantia nian ba importadór Sasán Esensial sira	\$5,000,000	\$0	\$0	\$0	0%
	5.4 Fornese Suporta likidés Prazu Badak nian	\$3,500,000	\$0	\$0	\$0	0%
<b>6</b>	<b>Apoiú Diretu</b>					
5080505	6.1 Fornese pagamentu osan valór \$200 ba uma-kain ida-idak (MSSI)	\$15,000,000	\$66,856,800	\$66,527,692	\$329,108	99.51%
	6.2 Dezeña no implementa pagamentu subsidiu salariál ba beneficiáriu besik 30,000 ne'ebé kobre 60% husi sira-nia saláriu (MSSI)	\$14,688,000	\$0	\$0	\$0	0%
	6.3 Izensaun husi kontribuisaun ba Seguransa Sosiál tantu husi traballadór no empregadór sira (traballadór 30,000) (MSSI)	\$2,448,000	\$0	\$0	\$0	0%
	6.4 Izensaun husi selu aluga propriedade Estadu nian ba ema ne'ebé aluga (MJ)	\$1,217,100	\$0	\$0	\$0	0%
5080504	6.5 Tulun estudante timoroan sira iha rai-li'ur ho despeza subsisténsia nian (MNEK)	\$2,404,850	\$3,233,696	1,343,100	\$1,890,596	41.53%
	<b>TOTÁL</b>	<b>\$88,274,151</b>	<b>\$91,716,636</b>	<b>\$81,031,234</b>	<b>\$10,685,402</b>	<b>88.35%</b>

Nota: despeza balun, hanesan ezemplu, estratèjia 1.1 kobre despeza jerál ba estratèjia sira seluk (2.2 no 1.2). Totál ne'ebé gasta ona refere ba totál Atual. Kompromisu no Obrigasaun tuir rejistu iha relatóriu Freebalance nian. Orsamentu ne'ebé revee ona refere ba ajustamentu ne'ebé halo husi Ministériu Finansas, hatudu valór ne'ebé alokadu ona.